

Folo yana leta nagona TESALONAIKA tovetumagana agaidiya

Hida Tesalonaika tovetumagana yadi leta nagona Folo Kolinita againe gimiyami tu gi'etoladina. Tesalonaika melala kikaiwabuna taliyeya Masedoniya ana fafaliya. Boi Folo yana lumamala-waliliuga anavelu againe gina Tesalonaika againe Venuwa'ata Yamumuna gimidilumamalena be ekelesiyai-nadi gitubuyemu. (Afositolo 17:1-14) Tovetumagana tufoidi miYuda tu tufoidi moya'aidi yo'o tulidiyao kalivai-dina. MiYuda tufoidi Yesu ana tafalolo againe hidamana fa'ina, adi tonagona higa'uma'uma-mo'a be Folo ahenao hiwavidi be hina Beliya againe. Muliya Folo Timoti gi'iveninisena be miTesalonaika valeyadi hagiha gina gi'aliyena.

Hida leta againe Folo givesiule miTesalonaika yadi vetumagana vita tulina tulina agaidiya hiki-donena fa'ina kadu hidu'udu'una fa'ina. Folo nuwanuwana ase'asedi ginakivevatuna ada yadi toliluvaluva Yesu aimo keke gidayewa'ela tu badi tovetumagana himadu'alika-ma fa'idiya gifatana. Leta dobona hidede amine.

Lusiule. 1:1

Vesiule yadi vetumaganadona fa'ina. 1:2-10

Folo yana dewa miTesalonaika hinafadiya ma.
2:1-12

Gavaimi yadi miyami fa'ina Folo nuwana gin-auna. 2:13-3:13

Lau'age dewa Yesu ana tovetumagana adi lauboda fa'ina. 4:1-12

Yesu yana yewa'ela ana kivetuvetunu ma. 4:13-5:11

Lau'age kadu lukafoi tulina tulina ma. 5:12-28

¹ Yo siule tobohiyameyao Yaubada yana yo'ogaga Tesalonaika againe kalivai-mina. Ime Folo Sailosi Timoti yami leta a'etoladina be wana'itana. Omi higa Yaubada Tamada kadu yada Kaiwabu Yesu Keliso yadi kaliva yadi vevine ma hinanuwadogemi kadu ase'asemi hinakiveniwalovina.

MiTsalonaika yadi vetumagana fa'ina to'etoladi hivesiule.

² Keke gavana fa'ina tu tova moya'aina Yaubada againe omi fa'imiya avesivesiule, kadu tova moya'aina yama ve'o'ola againe ami egana ayakayakahina. ³ Tova be tova Yaubada Tamada matane anuwa-nunauyemi higa Yesu Keliso wavetumaganena fa'ina wa'i'idibumuhiga, kadu Bana againe yami nuwanuwa wasena fa'ina yana faisewa againe wavedivediwe, kadu yada Kaiwabu Yesu Keliso yana yewa'ela walulubodena fa'ina wa'atu'atuvefa'ila. Tova moya'aina mena yami dewa haghagina yama ve'o'ola againe anuwa-nunauyena.

⁴ Tobohiyameyao, Yaubada nuwanuwana omi'iyao, ada ahalamanena Bana giluwafami be yana yo'ogaga wanamiyami. ⁵ Hidedemi ahalamanena, fa'ina Yaubada yana Venuwa'ata Yamumuna omi agaimiya alumamalena ana

toveya keke adagahe-kawowo au Alu'aluwa Mahalina gifaiwalavelema-yo yama laumamala ase'ase mi gi'onana, ada au ahalamanena makewa yama laumamala ma gahe vele mo'ena. Ada ime boi hinafamiya amiyami ana toveya, omi wahalamanena gavaimi ahuluhuluva medemi ami veluga fa'ina ahuluvina. ⁶ Tu omi'iyao ma ime wave'u'ulema kadu Kaiwabu wave'u'ulena. Vita tulina tulina kaliva nimadiya wanuhagana. Hidedemi omi yami watagiya nonogana Yaubada bonana keke wadakiloweni, au Alu'aluwa Mahalina gifaiwalavelemi-yo yami wavemwamwala wavenogalena. ⁷ Ada au hidedemi wahuluva fa'ina, omi aba'ita tovetumagana moya'aidi Masedoniya kadu Akaiya ana fafaliya himimiyami-ma fa'idiya. ⁸ Kaliva hiulega hiyuvedonena be agona yuwa lauveya ginauna amine, meda omi yami huluva haghigagina againe venuwa'ata Kaiwabu fa'ine fafali moya'aina lauveya ginauna. Keke yami fafali Masedoniya o Akaiya agaidiyagaga gidanauna, au yami vetumagana Yaubada againe valeyana fafali moya'aina yuwa lauveya ginauna. Medema fa'ina ime keke tamo gavadi anagaheyeni. ⁹⁻¹⁰ Au mena mali fafali kalivadi taudiyao ime yama ela agaimiya ma hilukahihiyena, higa yami wa'asehawahega wavega'aulema. Higahe higa vaita balauma wavekwaulaugedi-yo Yaubada againe wahagavilami be Yaubada vele mo'ena kadu miyamiya-vagahina againe wahawahegemi, ada higa Natuna lobameya ginatauya be babi ya ginayewa'ela-ma wanamiyabodana. Natuna Yesu

ma alikeya gisivemididina ada Bana'e Yaubada yana ila'a aimo tokoyona agaidiya ginalakayemu-ma againe gilulugolegole.

2

Folo yana faisewa miTesalonaika agaidiya fa'ina

tauna gibulava'itotogena.

¹ Siule tobohiyameyao, kadu omi taumiyao wahalamanena yama ela agaimiya au wa'agevavana. Keke ada'ela-kawowo higa vaita yama ela guwana keke. ² Wahalamanena boi melala ana egana Filifai againe kaliva himunukoyokoyoma kadu hi'ihawadamanema tu muliya miTesalonaika agaimiya a'ela. Ada nibaimeyao nuwanuwadi hinakivekoyoma nonogana Yaubada ase'asema gikivetoyogini-yo yana Venuwa'ata Yamumuna agaimiya alukahihiyena. ³ Yama lau'age inubana ma keke ve'alololo, keke nuwanuwa ita'italuvadigana fa'ina, kadu ime keke kaliva aikaunuwanuwameyao higa vaita yama bonayafayafa againe ananuwa'abiyemi, keke-mo'a. ⁴ Au Yaubada gavaimi yana nuwanuwa anagaheyeni, medemi tova moya'aina alulukahihi, higa vaita Yaubada yama dewa gida'itahalamaneni-yo ama vehimeya gidavelema, be yana Venuwa'ata Yamumuna analulumamalena. Keke kaliva nuwadi anakiveyamumuni fa'ina adalulukahihi. Au

Yaubada nuwana anakiveyamumuna fa'ina agahegahe, Bana'e yama nuwanuwa ka'i yamumuna o koyona gi'itanuwenuwena amanadi. ⁵ Omi wahalamanena keke tamo tova adabonayafeyafemi, keke tamo tova yami giba ada'italuvadigeni-yo bona digadigagina againe adasevauyeni, keke-mo'a. Agahe velemono'ena ma Yaubada gihalamanena. ⁶ Yama laumamala ana toveya keke kaliva agaidiya ama egana ana kailakata adaleleni, keke omi agaimiya kadu keke mali yo'o agaidiya adaleleni. ⁷ Ime Keliso yana afositolo yana kabu avaina fa'ina, gavadi gavadi ama itave'avina fa'ina agaimiya adave'o'ola digo, medema gidalubodana. Tu keke ama itave'avina fa'ina agaimiya adave'o'ola. Keke medede amine faisewa adavelemi. Au kwamayoku natudiyao kabi'odiyao hi'ita'itave'avidu amine, meda ime bonama bikabikana amine hinafamiya amiyami. ⁸ Yama nuwanuwa agaimiya ase-mo'ena fa'ina, ahawahegema be Yaubada yana Venuwa'ata Yamumuna agaimiya anavetalaiyena, tu keke Venuwa'atagaga au taumeyao ahawahegena ami veluga fa'ina. Omi vaita tobohiyanuwameyao amine fa'ina omi fa'imiya taumeyao ahawahegema. ⁹ Tobohiyameyao, makewa nuwami giulu yama wavediwe afifaisewa. Yaubada yana Venuwa'ata Yamumuna agaimiya alumamalena tu uyadayada be bogi taumeyao ama itave'avina fa'ina afifaisewa be keke ama ve'a fa'ina omi vita wananuhagani.

¹⁰ Tu yama dewa fa'ina omi amifaiweya wana'awatalatalaina kadu Yaubada anafaiweya

gina'awatalatalaina, higa yama huluva omi tovetumagana agaimiya au hagihagina kadu tunutunugina, ada keke tamo gavadi koyona agaimiya adafaisewani. ¹¹ Fa'ina wahalamanena kaliva natuneyao g'ilitave'avididi amine, meda ime omi sa'eyana sa'eyana a'itave'avimi. ¹² Boi tova moya'aina alulu'ageyemi, ase'ase mi akikivevatuna kadu agahegahevagadonemi be gava dewa Yaubada yana kaliva gilubodadi, medede amine wanahuluhuluva. Yaubada gikovami be yana yo'ogaga kalivai-mina vevine-mina ase'ase miya ginavehivehimeya ada Bana buye wanakaiwabu.

Folo miTesalonaika yadi vetumagana fa'ina givesiule.

¹³ Kadu'e nuwanuwa sa'eyana fa'ina Yaubada againe avesivesiule, higa Yaubada bonana agaimiya alumamalena be wanogalina againe, keke wadagahe wadagayo, "Wama tomiyababi bonadi." Au wagayo, "Wona velemona Yaubada bonana hilulumamalena." Ada velemono'ena medema Yaubada bonana, ada guwana omi tovetumagana nuwaginagemiya giseusena. ¹⁴ Fa'ina tobohiyameyao wa'ita, Yaubada yana yo'o tulina tulina Yudiya ana fafaliya Yesu Keliso againe himiyave'avina-ma hinuhagana amine, meda omi wanuhagana. Badi miYuda taudiyao yadi yo'o kalivai-dina Yesu Keliso againe hivetumagana-ma hikivekoyodi amine, meda yami yo'o kalivai-dina omi hikivekoyomi.

15 Badi miYuda Kaiwabu Yesu hiluve'alikana ada Yaubada bonana ana to'awatalatalaina hiluve'alikadi kadu ime hiwavima. Wona velemona Yaubada nuwana hikivekoyona ada yadi venibaina fa'ina kaliva moya'aidi adi kibababala ana eda hisebodana. 16 Wa'ita, higuvaluva be hinahawatama be higa kibababala ana eda yo'o tulidiyao kalivai-dina agaidiya keke analumamalen. Au hidede amine yadi koyona ana gowa hivemagana. Tuwaina hivebutu koyona moya'aina hive'atutamo'aina be hinunauwena tova hidevama, ada yadi koyona ana gowa hivemagani-yo au adamoya Yaubada yana ila'a guwana badi agaidiya gilakalakayemu.

Folo nuwanuwana lakahina miTsalonaika

buye hinavemagigi'ita'ita.

17 Tu tobohiyakweyao ide fa'ideya ganagahe. Tuwaina badi kalivai-dina hiwavima-yo ahegemi tu nuwama mene aimo agaimiya gimimiyami. Tova kabisona kanuvehaila tu avebutu eda alelelena be anayewa'ela, agaimiya atalatalanuwaiyemi fa'ina. 18 Fa'ina nuwanuwama agaimiya anayewa'ela. Iya Folo tova gavaiyehi gavaluvaluva be ganayewaku tu Setani yama eda gisebodana. 19 Yada Kaiwabu Yesu Keliso ginayewa'ela be Bana matane kanamiyami ana toveya, gava'adi yama abaluve'avina? Gava'adi yama abavemwamwala yama abagakahikahi? Me omi'iyao. Omi Yesu Keliso againe wamiyave'avina fa'ina, yama

wavemwamwala anagakahikahi anagayo, “Hida hima yama faisewa guwana.” ²⁰ E, wona velemona omi'iyao yama abagakahikahi kadu yama abavemwamwala.

3

*Folo Timoti miTesalonaika agaidiya
gi'iveninisena*

be valeyadi gina'aliyena.

¹ Tobohiyameyao, keke buye kadav-emagigi'ita'ita fa'ina, ime ama'itoto a'ase'u'aulolo. E, ase'asema gi'u'aulolo-mo'a againe agahe agayo, “Ama'iselu-mo'a Adenisi againe anamiyami tu Timoti ginana.” ²⁻³ Au tobohiyama Timoti agaimiya a'iveninisena, bana'e Yaubada buye hifififaisewa be Venuwa'ata Yamumuna Keliso fa'ine gilulumamalena. E, tobohiyama a'iveninisena be Keliso ana vetumagana againe ginakivetoyogimi, kadu ginalu'ageyemi higa vaita vita tulina tulina kaliva nimadiya wanuhagana fa'ina keke wananuwayewa. Omi taumiyao ahe wahalamane-hagihagiyena mena vitai-dina Yaubada yana vehimeya againe ide agaideya gilakayemu. ⁴ Ika, boi aimo buye kamiyami ana toveya avenuwa'ata-vagahimi vaita kaliva hinakivekoyoda. Ada taumadi wahalamanena medede amine gilakayemu. ⁵ Ada vitai-dina wanuhagana fa'ina ase'aseku gi'u'aulolo-mo'a againe, Timoti ga'iveninisena be higa yami vetumagana valeyana gananogalina.

Gamatauta ka'i Setani tamo gavadi againe gida'aladibidibiyemi ada au yama faisewa guwana gidaluyaweyawelina.

MiTesalonaika valeyadi yamumuna Folo gino-galina fa'ina,

givemwamwala.

⁶ Tu Timoti agaimiya gitauya be ime agaimeya giyewana ada valeyami yamumuna gi'aliyena, higa yami wavetumagana yami wahawahega wamimiyami. Gigahema vaita tova moya'aina wadu'udu'uma kadu ime nuwanuwama omi ana'itami amine meda omi nuwanuwami ime wana'itama. ⁷ Tu tobohiyameyao, yama ase'u'aulolo kadu ama vita tulina tulina agaidiya omi fa'imiya ase'aseva givatu. E, yami vetumagana fa'ina a'asevatu. ⁸ Ka'i omi Kaiwabu againe wanavetumagana toyogina be keke ma'ita wananuwayewa amine o, ime wayawaima hagiagina anamiyami. ⁹ Omi fa'imiya Yaubada againe avesivesiule. Yama vemwamwala lakahina omi fa'imiya givelema ada Bana matane avemwamwala-mo'a. Yada Yaubada keke kanawona! ¹⁰ Bogi be uyadayada Yaubada againe a'awalulau'u higa vaita buye kanavemagigi'ita'ita ada gavaimi yami vetumagana againe wakali'uhō, medema againe anavelugami be yami vetumagana ginatubugamo'a.

¹¹ Tu ave'o'ola be Yaubada Tamada Tauna kadu yada Kaiwabu Yesu yama eda hina'ivetuvetununa be agaimiya

ana'ela. ¹² Kaiwabu Yesu againe ave'o'ola be yami ve'ahawahawahega kadu yami nuwanuwa hawahawahegana kaliva moya'aidi agaidiya ginatubutubuga ginatubutubuga tu nuwanuwa hawahawahegana againe wanawahivemavemauga. Omi ami nuwakabubu againe ime awahivemavemauga amine, meda omi ve'anuwakabubu againe wanawahivemave-mauga. ¹³ Kadu yada Yaubada ginafaiwalavelemi be aimo yada Kaiwabu Yesu ginayewa'ela ana toveya yana kaliva mahamahalidiyao buye'i, kadu omi mahamahalimiyao keke tamo yami wakoyona Yaubada Tamada matane wanamiyami.

4

Yami dewa moya'aina againe Yaubada nuwana wanakiveyamumuna.

¹ Siule tobohiyameyao, kadu yaku gahe sa'eya-mo'ena. Boi akivetuvetunumi higa gavaimi wanahuluhuluva be Yaubada nuwana wanakiveyamumuna fa'ina. Ada au hidede amine wahuluhuluva. Tova adamoya Kaiwabu Yesu ana eganeya ave'o'olemi kadu agahevagadonemi be mena dewa hagihagina againe wanatutuveguvegulami. ² Fa'ina ahe wahalamanena gava vehimeya Kaiwabu Yesu givелеma, medema ahawavelevelemi.

³ Tu Yaubada yana nuwanuwa omi fa'imiya hidede amine. Nuwanuwana mahamahalimiyao wanamiyami ada udo tulina

tulina wanavekwaulaugedi. ⁴ Gilubodana be moya'aimi sa'eyana sa'eyana nagomi ana hawata fa'ina halamana wanavaina. E, dewa tunutunugina amine Yaubada matane kadu kaliva matadiya yami nuwanuwa aya'ayafanina wanavehimeyena. ⁵ Badi kaliva Yaubada keke hidahalamaneni-ma matadigadigaga againe hihawahawahegedi be keke ma'ita taudiyao hidahawatadi. Keke badi amine wanahuluva. ⁶ Kaliva yadi huluva vevine agaidiya ma keke tamo hakwadi tobohiyana vavinena agaidiya ginakiluvaluva be hidede amine bana againe ginakivekoyo ada yana abavehimeya keke ginawowomumuyeni. Boi avenuwa'atami kadu agahemi toyogina, ka'i kaliva vevine agaidiya hinakoyo, au Kaiwabu adi matahiwadi ginaveledi. ⁷ Fa'ina Yaubada keke gidakovada-yo udo againe kanamiyami. Au gikovada be dewa yegayegana againe kanamiyami. ⁸ Hidema fa'ina hai kaliva mena yaku kivetuvetunu gikilowena, keke kaliva bonana gidakiloweni au Yaubada Bana Alu'aluwana givelemi-ma bonana gikilowena. Yaubada yana nuwanuwa omi fa'imiya au hidede amine.

⁹ Tu ve'ahawahawahega tobohiyamiyao tovetumagana ami yo'o agaimiya fa'ina ime keke ana'etoladini, fa'ina omi taumiyao ve'ahawahawahega ana nuwanuwa fa'ina Yaubada againe ahe wasikulu. ¹⁰ Ada wona velemona tobohiyamiyao tovetumagana adi yo'o Masedoniya ana fafali matatabuna agaidiya ve'ahawahawahega amine wahuluhuluva. Tobohiyameyao, kadu anagahevagadonemi

be ve'ahawahawahega againe wanatutuveg-
 uvegulami. ¹¹ Giluboda-mo'emi be kukuya
 againe wanamiyami, ami mata'atubodagaga
 wana'itave'avina, keke wanamiya-kawowo au
 taumiyao nimamiya wanafaisewa-hagihagi
 boi akivetuvetunumi amine. ¹² Medede amine
 wanahuluva be higa keke tamo hakwadi againe
 amiga ami kevakeva fa'ina wanavetumagana,
 au taumiyao yami faisewa againe wanavaivaina,
 ada au hidede amine yami dewa ginalubodana
 badi Yesu Keliso keke hidavetumaganeni-ma
 matadiya.

*Yesu yana yewa'ela ana toveya to'alika
 tomiyami fa'idiya.*

¹³ Tu tobohiyameyao, keke nuwanuwama
 badi alika againe hi'enonuwaulu-ma fa'idiya
 wananuwanuwafani be higa badi Yaubada
 keke hidahalamaneni-ma hitagitagi-fa'ila
 amine omi keke wanatagitagi-fa'ila. Badi yadi
 abaluve'avina keke, fa'ina keke hidanuwanuwa
 vaita tobohiyadiyao hi'alika-yo hina Yesu buye
 himimiyami. ¹⁴ Ide kavetumagana higa vaita Yesu
 gi'alika be gimididi-havagi. Medema fa'ina kadu
 kavetumagana higa vaita Yesu ginayewa'ela ana
 toveya, Yaubada badi Yesu ana tovetumagana
 hi'alika-ma gasivemidididi be Yesu buye
 ginanauwedi yana abageya. ¹⁵ Kaiwabu Tauna
 yana gahe amine hidedemi avenuwa'atami,
 higa Kaiwabu Yesu ginayewa'ela ana toveya
 ide gaveyao Yaubada keke gidavega'auleda

tu aimo wayawaida kanamiyami, medema keke wai kananagoni. Au badi alika againe hi'enonuwaulu-ma wai hinanagona tu ide wai kanamulina. ¹⁶⁻¹⁷ Au Kaiwabu Tauna lobama amine ginahobu'ela wakova'awafatafatana kadu lobama ana tovenuwa'ata kikaiwabuna wa'agona kadu Yaubada yana hiulega wa'agona. Ada nagona badi Keliso ana tovetumagana hi'alika-ma hinamididi-havagi au ide gaveyao Yaubada keke gidavega'auleda tu aimo wayawaida kanamiyami, medema auhe'ama ide buye se'eyaine ginakifatumida digo buhibuhi againe ginanauweda be lobama hinafane Kaiwabu buye kanave'anauhaga fa'ina. Ada au Kaiwabu buye kanamiyamiya-vagata. ¹⁸ Hidema fa'ina mena Kaiwabu yana gahe againe buye wanave'ahawahawavemoluva be yami tagiya to'alika fa'idiya ginahavaina.

5

Yesu yana yewa'ela fa'ina wanalulauboda.

¹ Siule tobohiyameyao, keke vaita gava tova o ka'i gava aituha Kaiwabu Yesu ginayewa'elama fa'ine ana'etoladini, keke. ² Fa'ina omi taumiyao wahalamane-hagihagiyena tokai'afu bogi againe tonimanuwa ginavefuta'ana amine, Kaiwabu yana yewa'ela tova kaliva ginavefuta'adi. ³ Kaliva hinagahegahe hinagayo, "Fafali moya'aina agaidiya niwalova gisena. Keke tamo vita kananuhagani." Hidedemi hinagahegahe tu auhe'ama agolaufofola lakahina

badi agaidiya ginalakayemu. Kwamayoku wahifugadi auhe'ama hinavefahedi be yadi aulolo ginayemu amine, meda badi tomiyababi agaidiya aulolo lakahi-mo'ena ginalakayemu ada keke adifaiweya hina'ota.

⁴ Tu omi tobohiyameyao Yesu yana yo'ogaga agaidiya keke uyuyu againe wadamiyami fa'ina, Kaiwabu yana tova keke ginavefuta'ami tokai'afu tonimanuwa uyuyuya givefuta'ana amine. ⁵ Au omi moya'aimi mahalina ana kaliva, yami dewa kabu'avane uyadeyadeya waseseyemaunena. E, ide keke uyuyu ana kaliva higa vaita bogi againe yada dewa sevasevauyana kadafifaisewani. ⁶ Ide mahalina ana kaliva fa'ina, keke kanadauda badi Yaubada keke hidahalamaneni-ma hidadauda amine. Au kanalulauboda ada taudeyao kanahawatada. ⁷ Au uyuyu againe kaliva hidadauda. Uyuyu againe kaliva gufa laulaugina hiyuyu-fa'ila be hivevekwavakwava. ⁸ Tu ide mahalina ana kaliva fa'ina, taudeyao kanahawatada. Vetumagana kadu nuwakabubu vaita manawada ana abaseboda amine kana'osena. Ada kibababala ana lulauboda vaita gaviya ana kedukedu amine kana'osena. ⁹ Keke vaita Yaubada yana ila'a guwana kananuhagani fa'ina gidavenuwadadaneda, keke. Au givenuwadadaneda be yada Kaiwabu Yesu Keliso yana veluga againe kibababala kananuhagana. ¹⁰ Bana'e ide fa'ideya gi'alika higa ka'i wayawaida kamimiyami o alikeya ka'enonuwaulu, au Bana buye kanamiyami fa'ina. ¹¹ Medema fa'ina Kaiwabu ana vetumagana againe buye wanave'alulau'age

kadu buye wanave'aveluveluga. Ada au wona velemona hidede amine mene wahuluhuluva.

Kivetuvetunu tulina tulina.

¹² Tu tobohiyameyao ave'o'olemi toyogina be badi Kaiwabu givegidedi be omi tovetumagana ami yo'o hinafamia hififaisewa-ma wanawowomumuyedi. Badi hi'ita'itave'avimi kadu hikivetuvetunumi.
¹³ Yadi faisewa hagiagina fa'ina yami wa'asehawahega wanave'amohimohinedi lakahina. Ada omi taumiyao veyao againe wanamiyami. ¹⁴ Kadu tobohiyameyao, agahevagadonemi be badi himiyamiya-kawowo wana'ago'abiyedi, badi matamatauhidiyao ase'asedi wanakivevatuna, badi kowakowadiyao wanavelugadi, tobohiyamiyao moya'aidi wana'atuvefa'iledi. ¹⁵ Hai kaliva nuwanuwana koyona kadu koyona againe ginalaufata, medema wanahawatana. Au giluboda-mo'emi be buye wanave'anuwanuwakabubu, kadu meda mali kaliva moya'aidi wananuwanuwakabubuyedi.

¹⁶ Tova moya'aina wanavemwavemwamwala.
¹⁷ Tova be tova Yaubada againe wanave'ove'o'ola.
¹⁸ Gavadi gavadi moya'aina agaimiya ginalakayemu, medema fa'ina Yaubada againe wanavesivesiule. Omi Yesu Keliso yana kaliva yana vevine fa'ina, Yaubada nuwanuwana omi medede amine wanahuluva.
¹⁹ Alu'aluwa Mahalina yana faisewa keke wanahawatani. ²⁰ Bana Yaubada yana

venuwa'ata tovetumagana gitunevehabalutugidi-
ma keke wanahawave'iyohoyohoyeni. ²¹ Gahe
moya'aina inubana ka'i Yaubada againe o
ka'i keke ma wananuwave'uve'una. Hadema
gahe velema'ena, medema wanavenogalena.
²² Koyona tulina tulina matatabuna wanavek-
waulaгена.

To'etoladi yadi lukafoi.

²³ Kafoi tobohiyameyao, Bana Yaubada
aseniwalova giveleveleda-ma gina'ihagihagiyemi
be yana kaliva yana vevine mahamahali-
mo'emiyao wanamiyami. E, ave'o'ola be
nuwahinagemi matatabuna kadu wowomi
matatabuna gina'itave'avina ginanunauwena
tu yada Kaiwabu Yesu Keliso yana yewa'ela
ana toveya wanamiyami ami vita keke. ²⁴ Bana
gikovami be yana yo'ogaga agaidiya waluku-ma
au hidede amine agaimiya ginagugai, ada Bana
giwonadabadaba amine ginagugaiyena fa'ina
adafaiweya kanavetumaganena.

²⁵ Tobohiyameyao, ime fa'imeya wanave'o'ola.

²⁶ Kafoi tobohiyameyao moya'aimi. Ime
fa'imeya tobohiyamiyao wana'atulauhidi higa
yama nuwanuwa hawahawahegana agaimiya
wadaseyemaunena. ²⁷ Kaiwabu ana eganeya
gavehimeyemi be tamo hakwadi tovetumagana
ami yo'o agaimiya hida leta a'etoladina-
ma tobohiyameyao moya'aimi matamiya
ginahawana. ²⁸ Yada Kaiwabu Yesu Keliso yana
nuwadogeya wanamiyami.

(Ime Folo Sailosi Timoti bonama.)

**YAUBADA BONANA VEYAO IVAGUNA Bona
Iduna**

**The New Testament in the Iduna Language of Papua
New Guinea**

Nupela Testamen long tokples Iduna long Niugini

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

PDF generated using Haiola and XeLaTeX on 11 Nov 2022 from source files
dated 22 Nov 2019

73458371-ad55-5c77-8b6b-5eca8d58f667